

Meeqqat atuarfiat pillugu Inatsisartut peqqussutaata allanngortinneqarnera pillugu Inatsisartut peqqussutissaattut siunnersuut

(Perorsaannermut aamma tarnip pissusaanut tunngasunik siunnersuinerup kommuninut suliassanngortinneqarnera)

(Naalakkersuisut)

Saqqummiussissut

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Siullermeerneqarnera

Naalakkersuisut sinnerlugit matumuuna meeqqat atuarfiat pillugu Inatsisartut peqqussutaata allanngortinneqarnera perorsaannermut aamma tarnip pissusaanut tunngasunik siunnersuinerup kommuninut suliassanngortinneqarnera pillugu Inatsisartut peqqussutissaattut siunnersuut saqqummiutissavara.

Naalakkersuisut 2008-mi suleqatigiissitaliorput Inerisaavimmit, KANUKOKA-mit ilinniartitaanermullu naalakkersuisoqarfimmit aallartitanit inuttalinnit. Suleqatigiissitap innersuussutigaa perorsaannermut aamma tarnip pissusaanut tunngasunik siunnersuinerup kommuninut suliassanngortinneqarnissaa. Perorsaannermut aamma tarnip pissusaanut tunngasunik siunnersuinerup kommuninut suliassanngortinneqarneqaratigut, kommunit meeqqat atuarfiannut suliassaqarfimmut pingaarnertut kommunip suliassarisaanut tunngasunut tamakkiinerusumik akisussaaffeqalissapput oqartussaassuseqalissallutillu.

Meeqqat ilinniartitaanermi inerikkiartornissaasa ilikkariartornissaasalu qularnaarnissaat suliassaqarfiit ilagaat Inatsisartut Naalakkersuisullu pingaartitaat. Taamaalillutik Naalakkersuisut Naalakkersuisooqatigiinnissamik Isumaqatigiissummi 2009-2013-mut atuuttumi siunniuppaat ilinniartitaaneq qaqugukkulluunniit inunnik isiginneriaaseq atuartut ilinniartullu ataasiakkaat piginnaasaannik pisinnaasaannillu tapersersuineq aallaavigalugit aaqqissuunneqassasoq. Kommunip akisussaaffik pingaarneq meeqqat atuarfiannut suliassaqarfimmut tunngasoq pigereerpa. Perorsaannermut aamma tarnip pissusaanut tunngasunik siunnersuinerup kommuninut suliassanngortinneqarnerata nassatarisaanik kommunip annerusumik meeraq qitiutillugu sullissisinnaalissaaq.

Inatsisartut peqqussutissaattut allannguutissatut siunnersuutip matuma ukiuni kingullerni politikikkut suliniutaasartut taperserpai.

Aningaasaqarnermut Nunanullu Allanut Naalakkersuisoqarfiup kajumissaatigaa nuussinissamut piffissaliussaq eqqartorneqaqqissaartariaqartoq. Taassuma saniatigut Aningaasaqarnermut Nunanullu Allanut Naalakkersuisoqarfiup maluginiaquaa Namminersorlutik Oqartussat kommunillu akornanni suli aningaasaqarnermut tunngasumik isumaqatigiissusiortoqarsimanngimmat, kissaatigalugulu taanna inissinneqaqqartariaqartoq suliap Inatsisartunut saqqummiunneqannginnerani. Avannaata ikaarsaariarnermut ataatsimiititaliaata piumasaraa perorsaannermut aamma tarnip pissusaanut tunngasunik siunnersuinerup kommuninut suliassanngortinnginnerini pitsaanerusumik piareersarnissamut sivisunerusumik piffissaqarnissaq.

KANUKOKA-p tamatuma tunuliaqutaanik namminerlu naliliinermik kinguneranik kajumissaatigaa suliaasaqarfik taanna suli qulaajarneqartariaqartoq.

Tusarniaanermi akissutit tiguneqartut kinguneranik Naalakkersuisut siunnersuutip atuutilerfissaa allanngortippaa, taamaalilluni Naalakkersuisut matumunnga nalunaarutiliornerisigut pisussanngortillugu. Naalakkersuisut pingaartippaat aaqquissuusaanermut ataatsimiititaliap kajumissaataa malillugu Inatsisartut inatsisitigut tunngavissaqalernissaat, tassalu PPR-ip kommuninut suliaasanngortinneqarnissaa. Atuutsisilernissamut piffissamik aalajangiisinnaanerup periaffissaqalersippaa isumaqatigiissusiortoqarsinnaanera kommunillu pitsaanerusumik suliaasanngortitsinerup tigunissaanut piareersarsinnaanerat.

Siunnersuut piffissami 21. majimit 9. julimut 2008-mi tusarniaassutigineqareerpoq. Tusarniaanermi akissutit sapinngisamik annertunerpaamik siunnersuummut ilanngunneqarput.

Taama naatsumik oqaaseqarlunga siunnersuut Inatsisartunut oqallisissanngortippara.